



La SRG SSR – per ina Svizra solidarica

La SSR è solidarica, cura ch'i va per interess umanitars. Las fundaziuns «Chadaina da Fortuna» e «Denk an mich», ma er emissiuns e projects sco «2 x Nadal», «Mintga rap quinta», «Cœur à cœur» e «Mitenand» demonstreschan quai regularmain.

La Chadaina da Fortuna – engaschament solidaric dapi il 1946

La Chadaina da Fortuna è vegnida fundada il 1946 dal schurnalist da radio Roger Nordmann e da l'entertainer Jack Rollan da Radio Sottens (oz RTS) a Losanna. Pauc suenter han er ils studios da radio da la Svizra tudestga, taliana e rumantscha surpiglià l'idea da far insatge cunter las suffrientschas che regivan suenter la Segunda Guerra mundiala. Uschia è la Chadaina da Fortuna daventada in'acziun da l'entira Svizra. Il 1948 ha già lieu l'emprima rimnada per victimas da catastrofes a l'exteriur (Moselle). Il 1983 ha la SSR statgà la Chadaina da Fortuna da sia organizaziun ed igl è sa sviluppà ina fundaziun independenta.

Damai che la «Chadaina da Fortuna» sezza n'è nagina ovra caritativa, vegnan las acziuns operativas realisasas da 25 ovras d'agid sco partenarias accreditadas: ADRA Svizra, Brücke – Le pont, Caritas Svizra, CBM Christoffel Blindenmission Schweiz, Moviment cristian per la pasch, Enfants du Monde, Unfrenda da curaisma (Fastenopfer), Handicap International, HEKS, Helvetas Swiss Intercooperation, IAMANEH Svizra, Medair, Medis dal mund Svizra, Medis senza cunfins, Nouvelle Planète, Save the Children, Crusch Cot-schna Svizra, SolidarMed, Solidar Suisse, Fundaziun Vischnanca d'uffants Pestalozzi, Swissaid, Swisscontact, Terre des hommes – agid a l'uffant, terre des hommes svizra e Vivamos Mejor.

En cifras

- Il 2017 han ins rimnà en tut passa 1,7 milliardas francs donaziuns.
- Il 2010 ha la Chadaina da Fortuna rimnà per l'emprima giada dapli ch'ina milliarda francs donaziuns.
- Il 2005 è stà in onn da record cun passa 300 milliuns francs regalads per las victimas dal tsunami en l'Asia dal Sidost e da las mauluras en Svizra.
- Dapi la fundaziun ha la Chadaina da Fortuna realisà ensemen cun la SSR var 50 dis da rimnar naziunals. La Chadaina da Fortuna ha appellà en 70 onns dapli che 190 giadas a la solidaritad cun las victimas da catastrofes e rimnà 1,7 milliardas francs donaziuns.

Projects ed acziuns exemplaricas

Cun ils passa 1,7 milliardas francs ha la Chadaina da Fortuna finanzià ils davos 70 onns radund 3500 projects internaziunals da sias organizaziuns partenarias en passa 70 pajais. La reconstrucziun dad entirs vitgs en l'Indonesia, en Sri Lanka ed en l'India suenter il tsunami dal 2004 sco era l'agid direct ed il sustegn per la reconstrucziun suenter il terratrembel dal 2010 a Haiti e quel dal 2015 a Nepal tutgan tar las prestaziuns extraordinarias da la fundaziun.

Dapi l'entschatta gida la fundaziun er umans en Svizra: passa 100 000 umans en miseria han survegni agid – l'emprim cun donaziuns materialas sco vestgadira, virtualias e medicaments, pli tard cun daners d'urgenza. Cun 209 milliuns francs vegnan sustegnidas victimas da mauluras en Svizra, surtut suenter las mauluras grondas dals onns 2000 (Gondo) e dal 2005.



«2x Nadal»

L'idea per l'acziun «2 x Nadal» è vegnida il 1997 curt avant Nadal a las personas preschentas ad ina seduta dal radio svizzer (l'emissiun «Espresso») e vegn dapi lura realisada da la SSR, da la Posta svizra e da la Crusch Cotschna Svizra (CCS) ensemen cun Coop cun donaziuns materialas. Il 2017 daventa era Coop ina partadra uffiziala.

Per blers umans è Nadal ina festa da l'abundanza – ma lunschora betg per tuts. En Svizra valan pli ch'in mez milliun umans sco povers ed ulteriurs 400 000 umans sco periclitads directamain da la povradad. Il patratg fundamental da l'acziun «2 x Nadal» è da sustegnair gist quels umans cun donaziuns materialas. L'acziun duai gidar glied basegnusa en Svizra ed en l'Europa da l'Ost.



En cifras

L'acziun «2 x Nadal» dal 2016/17 ha retschavi en tut 66 000 pachets. 64 000 pachets èn vegnids tramess per posta a l'acziun «2 x Nadal» u partads directamain a la CCS durant ils dis da Nadal. Anc ina giada passa 500 pachets ha Coop furnì gist sez a la CCS. 1800 pachets virtuals en la valor totala da 200 000 francs èn vegnids empustads e pajads via l'internet.



«Mintga rap quinta» / «Cœur à cœur»

«Mintga rap quinta» da SRF e «Cœur à cœur» da RTS èn concepts ch'èn vegnids svilupads tar il radio ollandais. Las moderaturas ed ils moderaturs da radio sa retiran en ina chasa da vaider. Or da questa «boxa transparenta» emettan els sis dis e renunzian per quest temp a nutriment solid. Las passantas ed ils passants pon visitar la boxa e gist far ina donaziun. Donaziuns èn pussaivlas era per telefon u cun in cedel da pajament. Durant l'emna datti diversas acziuns. Las auditoras ed ils auditurs pon giavischar in toc da musica cunter ina donaziun ed uschia influenzer il program u «cumprar» e trametter sms cun salids che vegnan visualisads al monitor. Avant e durant las acziuns han lieu en l'internet numerusas aucziuns. Ils retgavs vegnan medemamain regalads.



En cifras

Il 2016 ha «Mintga rap quinta» rimnà 6,7 milliuns francs. Cun quests daners ha la Chadaina da Fortuna sustegnì 30 projects en Svizra e trais a l'exteriur. L'agid è i a favur dad uschenumnads «minorens betg accompagnads». «Cœur à cœur» ha recaltgà en tut 1,2 milliuns francs per acziuns cunter la povradad en Svizra.

«Denk an mich» – in engaschament dapi 50 onns

La fundaziun «Denk an mich» s'engascha per persunas cun handicaps ed impediments. Ella pussibilitescha concretamain als umans pertutgads, a lur confamigliars ed a persunas accompagnantas da far vacanzas e da passentar dis recreativs – perquai ch'els na pon betg sa prestar quai.



«Denk an mich» è in'iniziativa instradada il 1968 dals redactors da radio Jeannette e Martin Plattner dal studio radiofonic Basilea cun l'appel da far donaziuns per uffants cun in impediment. Oz è «Denk an mich» uffizialmain «ina fundaziun da solidaritad da Radio e televisiun svizra». En in'emissiun da radio emnila rapportan ils responsabels dapi l'entschatta da l'engaschament davart las donaziuns ed il diever dals meds tenor l'intent da la fundaziun. L'emissiun pon ins actualmain tadar mintga sonda da las 9.40 fin las 9.50 sin Radio SRF 1 e sin Radio SRF Musikwelle.

Ils ultims onns ha «Denk an mich» adattà plazzas da giugar als bassegns da persunas cun in impediment. Construcziuns d'albierts per la giuventetgna ha «Denk an mich» sustegnì cun contribuziuns finanzialas ad infrastructures adattadas per persunas cun in impediment. En vista a ses giubileum vegn la fundaziun uss a sustegnair en moda particulara in project d'inclusiun a Berna ed in project da la REKA.



En cifras

Dapi il 1969 ha «Denk an mich» survegnì en tut bunamain 100 milliuns francs en furma da donaziuns ch'ella ha dà vinavant ad umans cun in impediment. Il 2016 ha ella dastgà sa legrar da 4,2 milliuns francs donaziuns. Ella ha sustegnì 2000 dumondas cun 3,8 milliuns francs. Grazia a quests daners han 25 000 umans cun in impediment gi la chaschun dad ir en champs da vacanzas u da profitar dad autras activitads dal temp liber.

«Mitenand», «ensemble», «insieme»

Questa emissiun sin SRF, RTS e RSI rapporta davart projects socials ed ecologics en Svizra ed en pajais en svilup. L'emissiun dat in-vista en il mintgadi da personas che fan strusch ina giada sensaziuns.

En Svizra datti tschientineras organisaziuns che rimnan daners da la populaziun per meglierar cun quels la situaziun dad umans dischavantagiads en Svizra ed a l'exteriur. Ils rapports preschantan personas pertutgadas per mussar co che las organisaziun d'agid reageschan sin problems socials, ambientals e sanitar. Quai cumenza tar posts da cussegliaziun per tschertas malsognas e tanscha fin tar gruppas d'agid a sasez e mesiras urgentas suenter catastrofes da la natira.

Dapi il 2005 producescha la SSR questa emissiun trilingua. Las organisaziuns che vegnan tematisadas vegnan tschernidas tenor criteris ch'èn fitg damanaivel da quels da la Chadaina da Fortuna.

«Mitenand» è vegni emess per l'emprima giada ils 5 da schaner 1975, da quellas uras anc sut il titel «...ausser man tut es». L'avust 1990 ha l'emissiun survegni il num ch'ella porta oz.

«La ligne de cœur» e «Nachtwach»

Mintga notg tranter las 22.00 e las 24.00 uras è «La Ligne de cœur» sin RTS La Première qua per ils quitads e pensiers da las auditoras e dals auditurs. L'emissiun è ina chaschun bainvegnida per umans che vulan svidar lur cor e raquintar da quai che fa fastidis ad els. Tenor il medem concept funcziuna «Nachtwach», in'emissiun ch'ins po tadlar resp. guardar mintga di sin radio SRF 3 ed a la televisiun sin SRF 1 suenter mesanotg.

«Chacun pour tous»

In ulteriur exempel co che vegn vivida la solidaritad tar SSR è l'emissiun «Chacun pour tous», en la quala vegn preschentà mintga di a las 9.29 sin RTS La Première in project social u umanitar. Las auditoras ed ils auditurs sa mussan dapi onns solidarics e sustegn a moda generusa las accziuns preschentadas ch'ina cumissiun da personalitads da la Svizra romanda ha tscherni.

